

四庫全書

集部

欽定四庫全書

宋元詩會卷六十三

兵部主事陳焯編

金詩附

魏搏霄

字飛卿初用蔭補以薦書從事史館明昌中宏詞
中選授應奉翰林文字未幾卒飛卿詩以富艷稱
如張公子席間賦嵩山筆力豪邁
党承旨許其在劉無黨之上云

田若虛遊龍門寶應用天隨子體賦詩因次其韻

少室右臂禹所斷開排清伊來高寒土肉養石自古秀
山腰流泉無時乾佛髻滴滴染深翠松風颼颼鳴驚湍
白傅已矣不可見予誰從之投歸鞍

王 礪

字逸賓先世原家臨洛至逸賓遂為汴梁人博學
能文不就科舉孝友天至非其食不食家無儋石
之儲宴如也明昌中故相馬吉甫惠迪知開封舉
逸賓王彥功游宗之德行才能逸賓得鹿邑主簿
乞致仕彥功以親老調鞏州教官宗之讓不受
三人者雖出處不齊而時人皆以高士目之

次文遠韻

野性唯便閒
寂居蒼苔鳥
跡滿庭書林
花過雨紅猶
重籬竹和烟
翠亦疎已與
農人成保社
更令兒輩學
耕鋤賞音只
有東郊客日
袖新詩到敝
廬

雜詩二首

晴日南溪物
色饒草芽新
綠凍全消金
絲柳底洲沙
沒數尺流波
拍夜橋

漢梁王苑古
臺西秋思紛
紛獨杖藜雲
壓高城鴈飛
盡一聲寒角
夕陽低

劉濤

字及之夏津人明昌二年同進士用戶部尚書孫鐸薦入翰苑歷太原運副汾州倅入為太子贊善以彰德治中致仕尋卒沁南節度康瑋良輔葬之林慮之寶巖

宿平遙集福寺

院僻和僧靜門閒與晝長燕泥朝雨淖蝶藥晚風香野興前詩思乾愁繞客腸青奴如解事供我暮窗涼

送王純叔守曹州

柏路人看御史驄年來眼落簿書叢單車乍別金鑾月

五馬頻嘶玉勒風故國山河連小鄆舊家雞犬識新豐
遙知別夜詩成處醉袖淋浪蜜炬紅

路鐸

字宣叔伯達之子與弟和叔父子俱有重名而宣叔文最奇尤長於詩精緻溫潤自成一家任臺諫有古直臣風貞祐初出為孟州防禦使城陷投沁水死有虛舟居士集得之鄉人劉庭幹家

雨中

月翳有時吐風熏俄自清雲迴暑天影雨進夜窗聲眼
聽參天籟神遊得化城覺來還故處饑鼠撼燈檠

汴梁公廨西樓

雲態看來變，簷陰坐次移。一蟬吟未了，雙鳥去何之。薄
宦槐安夢，浮名劍首炊。安心元有法，遣興可無詩。

七夕與信叔仲荀會飲晚歸有作

秋香瀉月笑談香，飲散歸來夜未央。闕角星河搖淡影，
柳行燈火試新涼。雄飛勲業歸時輩，信美江山著漫郎。
萬事浮雲心鐵石，休將梁國嚇蒙莊。

師拓

字無忌平涼人舉進士不中明
昌中有司薦其才以嗜酒不果

冬夜

雲破月穿牖夜嚴風號隙客子寢不安寒燈照空壁默
然不平事起坐長太息書但記姓名劍本匹夫敵追奔
幕前哲恢張濟時策何意造物兒重此稻粱役興酣氣
益振孤憤遠飄激非無南山雲高臥養虛寂茹芝酌縣
流嘯吟展胸臆聖達豈不念且有不暖席此抱與誰知
乾坤夜寥閨

遊同樂園

晴日明華構繁陰蕩綠波蓬丘滄海遠春色上林多流
水時雖逝遷鶯暖自歌可憐懽樂極鉦鼓散雲和

郡城南郭早望

曉立回塘上何人逸興同柳濃天霽雨萍圻岸含風鳥
影明蒼靄湖光倒碧空秦川何日到解髮濯清澧

中元後二日

暑謝涼生際庭虛雨過時天長雲斷續風急樹離披世

態貧逾薄秋光老易悲燕城寒事早還與舊貂期

鄴權

字元興安陽人作詩有筆力父瓊金初有功仕至武寧軍節度使元興以門資叙宦不達朝議高其才明昌初以著作郎召之未幾卒有坡軒集行於世

竹林寺矮松

蒼烟靄山曲回溪抱脩筠中藏古佛宮荒僻無四鄰
靈松插殿角偃蹇今幾春何年霹靂雨投石搜濤鱗
謫重飛舉難墮此蜿蜒身聯拳縮爪股氣屈不得伸
臥枝老

無力支撐藉樵薪無風自悲吟失水固不神安論才不
才禍福了已分南山聳千嶂直幹排風雲正以中繩墨
中道遭斧斤豈知無用資千歲保其身

西遊

茅店雞聲外柴車犬吠間疎星涵積水殘月墮昏山好
夢人何在秋風我獨還梨園有名酒聊此慰間關

七夕

縹緲針樓外天教彩羽過步雲榆送影拂月桂交柯繡

縷縈芳袂瓜蓮得巧梭常娥如解妒還與試斜河

留仲澤

朝初猶濕紫宸霞暫輟旌旗擁使華馳馬彎弓真將種
載書囊筆自名家江湖萬里春回鴈燕趙千林月滿花
明日升沈便霄壤更留玉樹倚蒹葭

寄唐州幕官劉無黨

白髮青衫宦苦卑邊荒誰識鳳麟姿河西落魄高書記
劍外清貧杜拾遺紫玉山高傳楚夢蟪珠淵靜照黃陂

禁中頗牧他年事先遣江淮草木知

楊雲翼

字之美樂平人以明昌五年登經義進士第一人
詞賦亦中乙科天資穎發博通經傳至於天文律
歷醫卜之學無不臻極事母孝與人友款曲周密
處事詳雅而能以大節自任南渡後二十年與禮
部閒閒公代掌文柄時人號楊趙而公以後輩自
處不敢當也宣宗頻歲南伐事勢有決不可者論
議之際時相多以避嫌不敢言公獨直言極諫以
為兩淮生靈皆陛下赤子不能外禦北兵而取償
於宋以天下為度者不如是也是後再出兵時金
一軍幾為宋人所覆宣宗悔悟責主兵者曰我當
何面目見楊雲翼也興定末拜吏部尚書中外望
其旦暮入相竟以足疾不果正大五年八月終于

翰林學士年五十九謚曰
文獻子恕字誠之第進士

大秦寺

寺廢基空在人歸地自閒
綠苔昏碧瓦白堦應青山
暗谷行雲度蒼烟獨鳥還
喚回塵土夢聊此弄澄灣

烟雨

涼氣先秋至重陰接望迷
有無山遠近濃澹樹高低
鳥雀枝間露牛羊舍北泥
支頤政愁絕風雨過前溪

侯右丞雲溪

功成何許覓菟裘
天地雲溪一釣舟
夢破煩襟濯明月
詩成醉耳枕寒流
西風歸興隨黃鵠
皎日盟言信白鷗
政恐蒼生未忘在
草堂才得畫中遊

光林寺

烟浮霜堦閉禪關
今落先生杖履間
碧水同來弄明月
黃塵不解汙青山
因緣多自成三宿
物我終同付八還
欲識光林全體露
松花落盡嶺雲閒

謾興

乍寒簾幙一燈青從吏羈情爾許情葉擁西風秋有思
天垂北斗夜無聲吟蛩遶夢家千里過鴈連愁月四更
寄語黃華耐岑寂好看霜藥到歸程

李純甫

字之純弘州人承安間進士仕至尚書右司都事
三十歲後編觀佛書能悉其精微既而取道學書
讀之著一書合三家為一就伊川橫渠晦菴諸人
所得者而商略之毫髮不相貸且恨不同時與相
詰難也

灞陵風雪

君不見浣花老人醉歸圖熊兒捉轡驥子扶又不見玉
川先生一絕句健倒莓苔三四五蹇驢駝著盡詩仙短
策長鞭似有緣政在灞陵風雪裏管是襄陽孟浩然官
家放歌殊不惡蹇驢大勝揚州鶴莫愛東華門外輭紅
塵席帽烏韉老却人

怪松謠

阿誰栽汝來幾時輪囷擁腫蒼虬姿鱗皴百怪雄牙髭
擎空天矯蟠枯枝疑是秘魔巖中老慵物旱火燒天鞭

不出睡中失却照海珠差入黃泉蛻其骨石鉗沙錮汗
且僵埋頭臥角政摧藏試與摩挲定何似怒我振觸鬚
髯張壯士囚縛不得住神物世間無著處隄防夜半雷
破山尾血淋漓飛却去

史肅

字舜元本京兆人僑居北京之和衆幼孤養於外
家天資挺特高才博學作詩精微有理尤善用事
古賦亦奇峭工于字畫業科舉為名進士立朝為
才大夫優于政事所至有聲吏畏而安之累以廉
陞歷赤縣及幕官入為監察御史遷治書出刺通
州大中黨獄起為所註誤謫靜難軍節度副使大

安初召為中都路轉運副使超戶部
正郎復坐鑄降同知汾州事卒官

別張信夫

破壘殘星沒寒城曉角孤天低雲錯莫野曠雪糝糊小
市千錢米征人丈八父邊愁故未已不敢恨長途

物化

物化能忘我天遊不用心羶香羣蟻聚樹靜一蟬吟敗
井勞深汲荒庭闕近尋枕書聊假息夕日半牆陰

北潭

竹陰松影玉蔥籠十里平堤一徑通碧水乍開新鏡面
青山都是好屏風寒蟬高鳥清愁外折葦枯荷小景中
酒力未多秋興逸夕陽聊貸半林紅

早出遵化

朝來對酒不能觴看盡西風去鳥行山好未忘三日雅
詩窮贏得一秋忙彊顏紅葉自由舞野性黃花無賴香
多謝殷勤暮雲影更留淡墨寫溪光

蕭貢

字貞卿咸陽人唐太傅真十七代孫博學能文不減前輩蔡正甫大定二十二年進士自涇州觀察判官召補省掾不四五月拜監察御史累遷右司郎中預修泰和律令歷大興同尹德州防禦使同知大名府事陝西西路轉運使河東北路按察轉運使靜難軍節度事南京都轉運使御史中丞以戶部尚書致仕年六十

六終于家諡曰文簡

古採蓮曲

洋洋長江水渺渺漲平湖田田青荇荷艷艷紅芙蕖酣酣斜日外冉冉涼風餘
舊舊誰家子裊裊二八初兩兩并輕舟笑笑相招呼
悠悠波上鴛鴦潏潏蒲中魚采采不

盈手依依欲何如

漢歌

華陰雙壁傳山鬼
報道明年祖龍死
草間豪傑伺天時
攘袖撫衿爭欲起
叢祠篝火妖狐語
夥涉為王張大楚
南公舊有三戶謠
東井新看五星聚
中原茫茫走秦鹿
天遣沛公興白屋
大蛇斬斷素靈號
蚩尤祭罷朱旗矗
竭來扶義入關中
恩結人心帝道隆
秦法煩苛猶一洗
項王慄慄何勞攻
三傑相須力人紀
四老仍來安太子

已令陸賈說詩書更詔孫通制儀禮阿翁著手規摹遠
獨恨兒孫讀城旦王純霸雜寧不知不是不知知己晚

按部道中

寒城睥睨插山隅秋半霜風塞草枯月轉譙樓天未曉

角聲吹徹小單于

馬定國郢州城西亦有此末句當是偶同

龐鑄

字才卿大興人家世貴顯明昌五年進士風流文采為時輩所推字畫亦有蘊藉仕至京兆運使自

號默

翁

田器之燕子圖

器之自敘云明昌丙辰予從軍塞外合鹵里山野舍
荒涼難以狀言春末有雙燕亦巢此屋土人不之識
屢欲捕之予曲為全護此燕晝出夜歸予必開戶待
之忽一日飛止坐隅都無驚畏巧語移時不去予始
悟明日秋社此鳥當歸殆留別語也因作一詩贈之
云幾年塞外歷崎危誰謂烏衣亦此飛朝向蘆陂知
有為暮投茅舍重相依君憐我處頻迎語我憶君時

不掩扉明月西風悲鼓角君應先去我何歸此詩以
細字寫之為蠟丸繫之燕足上明年四月予受代歸
又八年泰和甲子任潞州觀察判官四月十二日偶
坐解舍之含翠堂忽雙燕至一飛簷戶間一上硯屏
予諦視之繫足蠟丸故在乃知此鳥蓋往年贈詩者
也因請同年龐君才卿畫為圖求諸公賦詩器之姓
田名琢雲朔人明昌五年進士仕至山東路宣撫使
田君才略燕雲客少年累有安邊策悔從筆硯取功名

直要橫馳沙漠北塞垣春雪白皚皚東風未放玄陰開
烏衣之國定何許一雙燕子能飛來三年驛舍安西道
眼底鶯花無夢到忽見低飛入短簷此身似向邯鄲覺
君居海東我中原相逢乃在穹廬前天涯流落俱為客
感時念遠空潸然長安何限高高閣晝夜風閒開翠幕
底事猜嫌不往依甘從此地風沙惡土人嗜肉無仁心
一生弋獵誇從禽有巢幸穩勿浪出汝身未必輕千金
朝來暮去益狎昵物我相忘情意一但怪重裘積漸添

元是西風催社日須知音巧惟鷓鴣忽來坐隅如告辭
我方留寓未歸得為君忍賦傷心詩詩成自述聊為戲繫
足封之亦無意燕已歸飛我未歸刁斗聲中忽驚歲旄
頭夜落妖氛收嫖姚獻凱歸神州玉關早喜班超入
北海不聞蘇武留君才經世寧終枉幕府須賢來上黨
別後歸期兩及瓜人間秋燕十來往沈沈官舍紅芳稀
葛衣燕居澹忘機忽聞巧語入簷戶大似相識來相依
一飛簷外窺庭樹一上屏山驚不去解足分明得帛書

真是當年留別句天生萬物禽最微固耶偶耶吾不知
古道益遠交情醺朝恩暮怨雲遷移當時握手悲別離
一旦富貴棄如遺聞予燕歌應自疑慎無示之嗔我譏

王良臣

字大用潞人承安五年進士作詩以敏捷稱又於
內典有所得入翰林與李欽叔善從軍南征欽叔
亦與行道中酬唱甚多有詩云蕎花冉冉蜜脾香
禾穗累累鵲鵲眼黃一縷晚烟吹不去為誰著意護
秋霜欽叔愛之興定初自請北
行沒于軍中贈孟州防禦使

九月七日飲

紫霞零落帶孤禽平楚蒼蒼秋意深月過初三半梳玉
菊迎重九滿籬金天憐病骨商量暖雲促歸程會計陰
風鴈飛來更瀟灑一枝蘆雪印波心

雜詩二首

老子平生酷愛閒天教行處得禪關粥魚敲落簷頭月
猶在梅花醉夢間

殘陽收拾弟兄行揀得機心不到鄉安置小奴今夜夢
蘆花風細月如霜

高廷玉

字獻臣恩州人大定末進士章宗衛王朝甚有時
名為人豪爽尚氣節一時名士多歸之貞祐初自
左右司郎官出為河南治中與知府復興屢以公
事相可否時都城受圍使驛阻絕復興為安撫副
使懼獻臣謀已乃以造逆誣之獻臣就逮龐才卿
雷希顏王士衡辛敬之皆被羅織幾有一網之禍
比赦至獻臣瘦死矣獻臣多作詩賦海中牛
頭云鑿開混沌竅闢出神農首人多稱道之

天津橋同李之純待月

驂鸞追散仙
乘槎抵銀潢
跳上玉龍背
抱得銀蟾光
素娥愁不歸
再拜捧瑤觴
問以天上事
玉色儼以莊
爾能

為我歌白雪我亦為爾搗玄霜不然借我廣寒殿與爾
長作無何鄉傍有謫仙人拍手笑我狂天風忽吹散人
月兩茫茫

飛山怨

漢家自有飛將軍軍中駭嘆箭有神一朝乃與獄吏對
惜無千金書牘背手把屬鏤口銜須臾天者三我何辜
伊吾壯志長已矣不得提攜玉龍死可憐休唱白浮鳩
至今秦人悲杜郵

道出平州寒食憶家

柳色方濃別玉京程程又值石龜城
山重水複人千里月苦風酸鴈一聲
上國春風桃葉渡東陽寒食杏花飴
楚魂蜀魄偏相妒兩地悠悠寄此情

柳絮

斷送春歸去紛飛不暫停和風三徑雪
微雨一池萍蝶惹依芳草蜂沾過小庭
靜宜投隙地狂欲攬青冥得得穿朱戶
時時撲翠屏黃鶯枝上語似與訴飄零

李適

字平甫樂城人明昌二年進士高才博學無所不通為人滑稽多智而不欲表表自見工畫山水得前輩不傳之妙龍虎亦入妙品然皆其餘事也

使高麗

去國五千里馬頭猶向東
宦情蕉葉鹿世味蓼心蟲
倦枕三更夢征衫八月風
山川秋滿眼歸思寄孤鴻

江村

陸地無根客江村有髮僧
兩盂殘喘粥一寸苦吟燈

送窮

昔年曾作送窮詩
結柳齋糧擬退之
送去還來因復語
君家猶有讀書兒

馮延登

字子駿吉州人
承安二年進士
令寧邊日適閒閒
公守此州與之
考論文義相得
甚歡故子駿詩文
皆有律度正大
末奉命北使見
留使招鳳翔不
從欲殺者久之
割其鬚髯羈管
豐州二年乃得
還天興初授禮
部侍郎京城陷
自投井中

宿三家寺

老柏蒼蒼纏老藤招提牢落有殘僧
暝禽自入藏經閣
饑鼠時窺照佛燈
未得安心如北秀
却思覓法逐南能
濛濛雨暗門前路
更得雲房一曲肱

寄笏青柯平

飛雪驚沙捲屋茅
清寒溼水透綈袍
松風度壑江聲遠
蘿月當軒扇影高
敢對名山談世事
不妨空腹貯離騷
且將手版牢藏起
政恐山人識馬曹

華清故宮

寵貴羊羔退曲江華清霧閣對雲窗層巒未了霓裳舞
遷客俄驚羯鼓腔簷際疎星疑曉鏡天邊晴樹認高幢
遊人尚喜風流在白石涵波阜莢雙

高憲

字仲常遼東人黃華之甥幼學于外家故詩筆字
畫俱有舅氏之風天資穎悟博學彊記在太學中
諸人莫敢與抗泰和三年乙科登第自言
於世味澹無所好惟生死文字間而已

寄李天英

稻積蒼蒼陂已枯西風剪剪美楸梧蒹葭水落魚梁迴

蟋蟀聲高山驛孤社甕新成元亮酒并刀細落李膺鱸
作詩遠寄霜前鴈人在海東天一隅

趙元

字宜之定襄人經童出身舉進士不中以年及調
鞏西簿未幾失明自少日博通書傳作詩有規矩
泰和以後有詩名河東李屏山為賦愚軒有落筆
突兀無黃初之句愚軒宜之自號也愚軒集中無
甚好句因金源人甚推之勉存一二其膾炙
人口者如鄰婦哭等詩意亦淺近不足錄也

書懷

懶退無心廩與庖願攜諸子屬山礲閒消白日醒吟醉

猛省浮生夢幻泡窈窕雲山三兔窟漂搖風樹一鳩巢
聯名便入村家社莫認公卿是故交

早發寶應龍門道中有感

山僧送客客行東迴首雲寮夢寐中人語呶呶村店火
帽簷敲側石門風伊川遠映春冰綠少頂先攬曉日紅
為問年來幾還往只應烏鵲識衰翁

密國公璫

字子瑜興陵之孫越王之長子百年以來宗室中
第一派人也少日學詩于朱臣觀學書于任君謨

遂有出藍之譽文筆亦委曲能道所欲言朝臣自
閒閒公揚禮部雷御史而下皆推重之賦資雅重
薄于世味好賢樂善寒士有不能及者所居有樗
軒又有如庵自號樗軒老人其詩號如庵小藁圍
城中以疾薨
時年六十一

老境

老境唯禪况幽居似寶坊酒盃盛硯水經卷貯詩囊懶
甚書彌少閒多夢自長不知何處雨徑作夜來涼

王生以秋騷見示謝之

三年京國與君遊每恨知君尚未周始露雄文凌楚些

又登長陌佩吳鉤燈殘茅店鷄催曉霜落金風鴈喚秋
後夜文星出西洛仲宣知在水南樓

思歸

四時唯覺漏聲長幾度吟殘蠟燭缸驚夢故人風動竹
催春羯鼓雨敲窗新詩淡似鷺黃酒歸思濃如鴨綠江
遙望翠雲亭下水滿陂青草鷺鷥雙

秋晚出郭閒遊

塵中俗事海漫漫暫出城闌借眼寬沙麓去邊羣牧小

野雲平處一鵬盤殘荷露水秋光晚衰柳搖風古渡寒
此幅大年橫景畫魯罔圖上似曾看

自題寫真

枯木寒灰久亦神因緣來現胙公身只緣酷愛東坡老

人道前身趙德麟

樗軒嘗封
胙國公

書龍德公八景亭

刻楠朱楹墮紺紗裙腰草色趨堦斜誰知剝落亭中石
曾聽宣和玉樹花

梁園

一十八里汴堤柳三十六橋梁苑花縱使風光都似舊
北人見了也思家

王特起

字正之代州崞縣人泰和三年進士調真定府錄事參軍有惠政改令沁原遷司竹監使廷議欲以館職召試會卒特起好學善議論音樂技藝無所不能其遊華山詩最為趙閒閒所賞

漫作

有時幽鳥話心事無限秋蟲誇口才北闕上書吾老矣

東籬把菊思悠悠
竹林留得巨源在
蓮社招入淵明來
不然餘子敗人意
懷抱耿耿胡為開

華山絕句

三峰盤地軸
一水落天紳
造化無遺巧
丹青總失真

馮壁

字叔獻別字天粹承安二年進士歷州縣召入翰林再為曹郎宣宗朝屢以使指鞠大獄權貴如歸德知府宿州總帥聲勢焰焰朝廷知其跋扈而不能摧伏者叔獻以法臨之毫髮不貸也幼有重名就所長論之館閣臺諫與賓客言乃其選也徒以小心奉法不畏彊禦故屢以城旦書屈之識者有

用違其長之嘆興陵末以同知集慶軍節度使事
致仕居崧山龍潭者十餘年諸生從之遊與四方
問遺者不絕賦詩飲酒放浪山水間
人望以為神仙焉年七十九終于家

雨後看竝玉所控諸峰

竝玉如高人壁立九千仞一日不見之令人生鄙吝春
深木葉敷秀色益濡潤結茅寄僧藍晴碧時得趣老宿
詫孫峰隅待到韶黓連延青一色枚數須諦認溟濛空
翠間我亦疑未信朝來雲氣昏埋沒瑜與瑾如蒼梧改
愁湘妃鬱思舜重陰俄解駁靈澍夕暉觀娟娟忽層出

歷歷分遠近雲峯互吞吐千狀纔一瞬出奇如孫吳相
降如廉藺如衆星拱辰如侯伯入覲接武如朋簪承迎
如价儔負固如吳楚爭長如齊晉怪詭如波斯駢羅貢
琛贐寔感如擒獲係繫將就轡如應龍神靈蟄臥時奮
迅如天駟超軼垌收稅羈勒如勁敵改容失箸駭疾震
如猛士無譁攢槊俟嚴陣獨兩峰巍然魁傑儼崇峻光
輔岳柱天鬱為中興鎮降生申及甫周室僨復振詩傳
配松高百世磨不磷

和希顏

虎守天門未易通
庾塵無扇障西風
主人何負海憎主
公論不明私害公
老伏固非千里驥
冥飛似是五噫鴻
紛紛往事渠知幾
都付松巔一笑中

雒帥覓蘭作詩以寄

雲插高牙畫戟新
春移寶檻燕堂深
水南紅藥初退舍
嵩麓紫蘭今嗣音
爾足頰肩坐香累
高梁華柱豈渠心
使君有問花應語
玉樹誠佳非故林

明皇擊梧桐圖

三郎耳譜趣花奴風調才情信有餘
天寶錯來非一拍
霓裳中節亦區區

習池醉歸圖

襄漢方屯十萬兵
習池日往不曾醒
紛紛誤晉皆渠輩
何獨王家一寧馨

王若虛

字從之
藁城人
承安三年經義進士
師其舅周德卿及劉正甫
得其論義為多
博學彊記
誦古詩至

萬餘首他文稱是善持論李屏山杯酒間談辯鋒起時人莫能抗從之能以三數語窒之使噤不得語甚為名流所推釋褐鄜州錄事歷門山令入翰林自應奉轉直學士居冷局十五年崔立之變羣小獻諂為立起功德碑以都堂命召從之從之外若遜辭而實欲以死守之時議稱焉北渡後居鄉里癸卯三月東遊與劉文李輩登泰山憩於黃峴峯之萃美亭談笑而化時年七十

贈王士衡

王生非狂者乃以善哭稱每至欲悲時不問醉與醒音詞初惻愴涕泗隨縱橫問之無所言坐客笑且驚王生不暇卹若出諸其誠嗟我與生友此意猶未明絲染動

墨悲麟亡傷孔情韓哀峻嶺陟阮感窮途行涕流賈太
傳音抗唐衢生古來哭者多其哭非無名生其偶然歟
何苦摧形神如其果有為為爾同發聲

貧士歎

甌無塵瓶無粟北風蕭蕭吹破屋入門四顧何淒涼稚
子低眉老妻哭世無魯子敬郭元振之真丈夫故應餓
死填坑谷蒼天生我亦何意蓋世虛名食不足爭如只
使冗且愚大腹便便飽粱肉

病中

學道今何得謀生久不成
藍衫幾棄物絳帳亦虛名
事拙應天意交疎即世情
煩憂時自解感觸又還生

題淵明歸去來圖

二首

孤雲出岫暮鴻飛
去住悠然兩不疑
我自欲歸歸便了
何須更說世相遺

拋却微官百自由
應無一事挂心頭
銷憂更藉琴書力
借問先生有底憂

還家 二首

山杏溪桃化棘榛
舞臺歌榭墮灰塵
春來底事堪行處
門外流鶯枉喚人

回思夢裏繁華事
幸及當年樂此身
閒立斜陽看兒戲
憐渠虛作太平人

麻九疇

字知幾莫州人三歲識字七歲能草書作大字有
及數尺者故所至有神童之目章宗召見問汝入
宮殿中亦懼怯否對曰君臣父子也子寧懼父耶
上大奇之興定末府試經義第一詞賦第二省試

亦然簾試以脫誤下第知幾先有才名又連名甲
選遠近想望風采雖牛童馬走亦能道麻九疇姓
名正大三年右相侯蕭公趙禮部連章薦知幾可
試館職乃賜盧亞榜第二甲第一人及第授太祝
權太常博士應奉翰林文字知幾天資野逸高騫
自便與人交一語不相合則逕去不返顧自度終
不能與世合
未幾謝病去

賦伯玉透光鏡

太陰淪魄元不耀太陽分光成二曜嗚呼怪銅盜此幻
透影在壁與背肖奩開燿燿光走庭劃如剗犀乍脫鞘
泓澄秋落百丈潭疑有龍向天門跳秦娃漢婉化鴛土

寵雨恩雲埋鳳詔當年椒塗鑑桃李身後泉臺映蓬翟
枕簟無情草木香笙歌不暖臬狐嘯髑髏一醜不再妍
不知持此將安照萬斛珠璣委甬人喚得偷兒成鬼剽
借問金槌一控時何如海上青蠅弔壽如金石佳且好
此銘此篆兩奇峭今誰子後曩誰先贏得鈿樞經蟻竅
千古繁華一夢醒恍然入手稱神妙丹砂變紫翠羽青
萬金難買人年少君侯新自洛陽來玉臺人物今溫嶠
相看大笑古人癡收鏡入奩還自笑

竹癭冠為李道人賦

東方有物字豐隆以鳴為職驅羣龍萬頭濺濺囚凍窟
欲出不出愁天公迴寒作暖出一噫黑帝不敢藏昆蟲
所以獨為六子長揮斥元氣周神功車轟鼓震頃萬里
六甲雲風隨喚起四陰用事合收聲猶奮狂陽鳴不已
號令非時遭物玩草木不凋花再蕾惱得司秋訴帝閣
漏泄機緘法當死天公大怪下桎梏推落車中墮巖谷
非程非馬亦非人化作蒼筤一枝竹勁氣剛風難遽銷

夜聞風雨猶蕭蕭
聳身直上三千尺
天公又怪千雲霄
鬼壓神縛不聽出
只見白雲鎖三日
雲散惟餘青屈盤
頤隱於臍變仙質
道人真是萬物盜
斫取為冠就天巧
秋霜爭敢上頭顱
常與春風同醉倒
此冠固奇惜未大
有冠獨在方之外
日月為藤織四時
烟霞為簪綿千載
天潢絕漢梁虛碧
北斗旋衡簪沆瀣
不隨脂粉侶
狡獪不逐風霜陪
獬豸一任旋乾復
轉坤頭上我我終
古在欲作檀那施
此冠不識先生若
為戴

梁山宮圖

梁山宮高高切雲秦家簫鼓空中聞
宮殿作雲王作龍
何人敢謁瀉池君
珠圍翠繞窮天下
道上行人衣半赭
不覺生靈血液枯
化為宮上鴛鴦瓦
朝盧生暮侯生
師事二人學羨門
焉知以政藏其身
神仙亦死何曾神
空能詐取六孱國
不識盧生真
間客種成間隙
盧生去尚令道士作鬼語
祖龍竟墮此機中
以壁見欺猶未悟
魚腥引得扛鼎來
梁山火滅漢旗開
何如後世丹青手
一

夫不役千樓臺梁山之圖却傳世梁山之宮安在哉

陽夏何正卿作疊語四句未成章予復以疊語寄

之凡四變

緼緼蠢蠢何等民矯矯亢亢內守貞昂昂藏藏獨異俗
落落莫莫不厭貧歸與歸與且餬口鳳兮鳳兮德衰久
樂云樂云無絃琴命乎命乎一杯酒匪鱸匪鮪故為臧
避言避世必也狂至大至剛秣吾馬爰清爰淨循我牆
用之捨之時所係晉如推如寧復計暖然凄然任春秋

優哉游哉聊卒歲

秋望

雲氣東南壯風烟正北長
遠人投屋小寒草帶城荒
馴鴨便秋潦饑牛背夕陽
閒情儘堪畫未要雨浪浪

手植檜印章

梁折山摧入小成日華留得寸暉明
不盈一握空蟲篆未喪斯文麤麤姓
名草木西周朝有暮圖書東觀死猶生
二千年後司封紐未信裁時出此情

秋懷

昨夜新涼御褐裘一番節物弄清愁月懸雙杵若為夜
人在一隅偏覺秋敗葉只能驚畫扇啼蛩終不到朱樓
還鄉夢斷寒衾曉依舊雲山是蔡州

李道人家山圖

見說高齋住太行溪山襟帶古祠堂主桐葉落周家雨
鐵樹根盤晉國霜烽火不堪耕夜月畫圖猶可挂殘陽
自憐不及汾州鴈春去秋來過石梁

牛歎

誰憐宿料一生無身後仍遭金十奴惟益却教蒙狗馬
不知何事負農夫

清明

村村榆火碧烟新拜掃歸來第四辰城裏看家多白髮
遊春總是少年人

紅梅

一種冰魂物已尤朱唇點綴更風流歲寒未許東風管

澹抹濃粧也自由

劉從益

字雲卿南山翁撫之曾孫大安元年進士拜監察御史坐與當路者辯曲直得罪去久之起為葉縣令未幾被召百姓詣臺乞留不聽入授應奉翰林文字踰月以疾卒時年四十四

過尉氏懷阮籍

朝來國門遊暮抵蓬池宿有懷阮步兵豪氣無檢束嘯歌陟高臺長風振林木老眼何曾青四海無一物萬古留詩名九原銷醉骨居然方丈家惜也微瑕玉塗窮道

不窮先生安用哭

清和即事

一度清明了一年溫風嫋嫋雨班班幾家繡幃尋芳去
何處蹇驢馱醉還宿草新墳驚世短落花流水占春閒
曉鶯啼破松窗夢缺月東來挂屋山

次韻三弟贈南菴老人

一菴盤礴勝巢仙不入叢林恰是禪花圃蓮塘閒即景
粥盂齋鉢老隨緣忘言已了八千偈適意更揮三兩絃

邂逅我來推不去坐分一半好風烟

宋九嘉

字飛卿夏津人黃裳榜進士乙科歷藍田高陵扶風三水四縣令皆有能聲入為右警巡使應奉翰林文字正大中病失音廢居歿于癸巳之禍

留別孫俊民姚公茂

草根殘日射離觴主席風生熱肺腸此去兜零紅照夜

輸君吹笛傍糟牀

公茂此時固已知名于金矣詩不佳因其別公茂也存之

酴醿菊

醪醪風味醺人醉著莫東籬愛酒翁一夜金英全換骨
冷香晴雪滿秋風

雷淵

字希顏別字季默同知北京路轉運使事思之季
子崇慶二年黃裳榜進士甲科釋褐涇州錄事徐
州觀察判官召為荆王府文學兼記室參軍轉應
奉翰林文字同知制誥兼國史院編修官拜監察
御史以公事免用宰相侯革卿薦除
太學博士還應奉終于翰林修撰

會善寺松


物生自有常怪特物之病嗟嗟此老蒼磊磊生魁柄侏

儒戲髀股宿瘤擁腮頸蜿蜒蛟龍戲騰擲猛虎競鬚髯
喜張磔意氣怒狂迸匠石求枿振節目足譏評芻蕘急
薪樵堅悍空盼瞪靜言觀倚伏未易相吊慶雖違時世
用顧免斤斧橫陽秋莫榮悴歲月何究竟盤盤曲則全
挺挺獨也正小草誤掃迹伏神還守性儻隨天中景廣
宇共床映

讀孔北海傳

漢室風流絕建安老瞞父子力排山可憐魯國真男子

也著區區七子間



宋元詩會卷六十三

欽定四庫全書

集部

宋元詩會卷六十五

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣王鍾泰

謄錄監生_臣張 鈞

欽定四庫全書

宋元詩會卷六十四

兵部主事陳焯編

金詩附

李獻能

字欽叔河中人年二十一以省元賜第廷試第一
宏詞優等授應奉翰林文字在翰苑凡十年出
為鄜州觀察判官用薦者復應奉俄遷修撰以鎮
南軍節度副使充河中經歷正大八年河中陷獨
得一船走陝州被召以道梗不能赴就
權陝府行省左右司郎中軍變遇禍

夜宿虛皇閣下

倚天青壁截雲霞一水高縣界削瓜不惜玲玕攀石磴
要看絢爛圻雲華玉峰影裏虛皇閣鐵笛聲中祕監家
明日川塗入塵土却應平地幾衰斜

上清宮梅同座主閒閒公賦

厭住盧家白玉堂琳宮瀟洒占年芳
光生琪樹風霜古影占銀潢月露涼
物外根株本仙種世間紅紫避嚴粧
遨頭詞伯今何遜一笑詩成字字香

送獵口號 二首

蓮燭金紗簇簇齊宮槐籠曉尚淒迷景陽鍾罷聽殘漏
萬馬銜霜不敢嘶

閭闔傳符啟九關一聲清蹕駐南山虎賁先導三千士
天馬初離十二閑

王渥

字仲澤以字行興定二年進士調管州司候不赴
壽州防禦使邦獻商州防禦使國器武勝節度使
庭玉愛其才連辟三府經歷官在軍中凡十年舉
寧陵令未赴丁母夫人憂廬墓三年服除復授寧

陵正大七年金國與宋議和擇可為行人者仲澤
以才選凡再至揚州制司宋人愛其才有中州豪
士之目使還以寧陵課最還一官入為尚書省掾
三月即授太學助教充樞密院經歷官八年院廢
擢右司郎中中年
失利不知所終

有寄

十年鐵馬暗京華客子飄零處處家
征雁久疎河朔信
小梅重見汝南花
棲棲活計依簷雀
冉冉年光赴壑蛇
舊雨故人應念我不來
聯句夜煎茶

寄京父

憶昔相從在寢丘城南城北縱歡遊杏花聯句香隨馬
野水添杯浪拍舟邂逅又從三月別飄零合負一春愁
汝陽淮甸經行徧應有新詩為我留

被檄再至揚州制司驛亭有題詩譏予和事不成
者云來往二年無一事青山也解笑行人因為
解嘲

二年奔走道途間知被青山笑往還只向江南南岸老
行人應更笑青山

冀禹錫

字京父龍山人崇慶二年進士調沈丘簿與縣令不相能及令以賊敗疑京父發之乃賂遺權貴誣京父以賓客依託之事坐廢十年正大中當路諸公極力辨其被誣乃得用常調守扶風丞召補省掾不就歸德奏充知事及城被攻京父為經歷官守禦之策一府倚重之車駕至授左右司都事兼應奉翰林文字官奴之變家人勸京父羸服免禍不從人有自外至者京父問賊入禁中否曰禁中賊滿矣乃自投水中

僧房

上方樓觀袂衣寒霜後川原眼界寬我是禪房未歸客

阿師休作長官看

張建

字吉甫蒲城人明昌初舉才行授絳州教官召為
宮教應奉翰林文字以老乞身道陵愛其淳素不
欲令去左右眷眷久之超同知華州防禦使事仍
賜詩有從今畫錦蓮峰下三樂休誇榮啟期之句
士林榮之吉甫自號蘭泉老人有集行于世

擬古四首

客從岳頂來貽我松粉黃為言服之久身輕欲飛翔我
嘗淡無味我嗅寂無香還君三太息世好方膏梁

枯桑依顙垣摧折生理微剝我枝間葉備君身上衣葉
盡誰復顧棲鳥亦來稀君看牡丹叢日日笙歌圍

庭前蘭蕙窠三年種不成門外旱蒺藜一旦還自生第
恐傷我足鋤去根與萌如何一雨後走蔓復縱橫

有客曳長裾袖刺謁高閣低頭拜閣者始得通姓名主
人果厚眷開宴海陸并顧必承彼顏語必順彼情不如
茅簷下飽我藜藿羹

送張子玉

渭水玻璃碧秦山劍戟明秋光如我瘦行色與君清蟬
嘒西風柳鴉翻落日城歸舟幸無物且莫苦貪程

毛麾

字牧達平陽人大定十六年舉學行特賜進士出身授校書郎入教官掖歷太常博士終于同知沁
州軍州事有平水集行于世

魏城馬南瑞以異香見貽且索詩為賦

二卉真香豈復加便宜編譜入雄誇留殘一點薰
薔薇水幻出諸天薝蔔花佩帶正垂金鈿小薰爐孤起翠雲斜

金籠甲帳豪華事慚愧桑樞甕牖家

春賞

潤土梅天雨乍晴喚回春意有新鶯雲霞照眼青山近
羅綺吹香白晝明翠勺銀罍沽酒市暖風遲日賣花聲
人人共喜華胥世何用鼉頭羨錦城

王琢

字器之平陽人與毛牧達同時相友善天性孝友
為鄉里所稱酷嗜讀書往往手自抄寫家素貧乏
而能以剛介自持未嘗有所丐貸時命不偶年四
十五以病卒士論惜之有姑汾漫士集行于世

癸酉歲大熱

似動不動雲蒸空欲雨未雨天無風時時日脚蹴雲破
一射萬土紅爐中纖絺挂體劇重鎧大屋僅可為樊籠
積水為丘坐自潰輕簑况得微涼通山林亦聞有暍死
城市偏側宜無容雖然一氣播常令頓作駭異疑非公
曾聞天南有祝融出入毒霧騎雙龍自從鼎去昧神怪
無乃煽虐行心胸手搖斗柄酌炎海力逐慄怒乘離宮
喜為鬱蒸怒為火流爍金石乾河洪熾昌自欲弄朱夏

驕蹇未肯官炎農烟霞灼灼燥昏曉鳥獸喘喘茫西東
此而不制滿三伏遂恐百物隨枯蓬太白之兵攢萬峰
銀河之浪滔無窮可洗虐焰夷姦凶我欲呼慙煩神功
耿耿九虎天關重

王元節

字子元弘州人祖山甫遼戶部侍郎父誨海陵朝
左司員外郎子元壻于南山翁傳其賦學第進士
雅尚氣節不能從俗俯仰故仕不達既罷密州觀
察判官即閒居鄉里以詩酒自娛號遜齋老人年
五十餘卒

古鎮道中

秀拔諸峰鎮海墩
海水氣兩昏昏
鷗飛翠竹白沙地
人宿黃魚紫蟹村
向背雲山行處路
淺深潮浦漲來痕
同遊幸有能詩客
不倦躋攀到石門

青塚

環佩魂歸青塚月
琵琶聲斷黑山秋
漢家多少征西將
泉下相逢也合羞

段繼昌

字子新白水人自號適安居士家甚貧而世間事皆不挂口有以錢遺之者必盡送酒家一日天苦寒人有遺之酒者飲不盡而醉夜半忽驚用衣衾覆酒缸僵臥榻上人為言酒自不冰先生將不為寒所病乎子新笑曰人病尚可酒病不可療也其好飲如此臨終辭鄉里託以他適明日臥于党氏園亭大石上視之已逝矣

梨花

一林輕素媚春光透骨濃薰百和香消得太真吹玉笛
小庭人散月如霜

春早

斷冰銷盡荻芽尖凍隴蘇來白薺添幾片野雲飛不去
晚風吹作雨纖纖

岳行甫

字仁老鄜州洛川人在關中最有詩名泰和初有
以仁老所作達之道陵者道陵大加賞異授以官
不就士論
皆高之

謝人惠二小漆冠

規製新翻出杜郎最宜閨子夜燒香不爭寶髻我宮樣
自與霓裳配道裝細攏翠鬟雲易滿淺銜牙櫛月難藏

水衡雙寄非無意要買楊枝惱孟光

立春日

銀線青絲翠椀堆爭牛擊鼓欲驚雷翻風鬪巧春頭勝
灑雪浮香臘尾杯迎暖梢梢金著柳逗寒葉葉粉飄梅
不成一事人空老半百光陰又七迴

周馳

字仲才濟南人經學出于醇德先生王廣道賦學
出于泰山李時亨至于党趙又其忘年友也資性
古雅而以襟量見稱大定中任太學屢試策
論魁多士貞祐之兵濟南陷不肯降赴井死

鼓子

私盍反
夫起也

勿以微才棄安危任不輕誰憐一片小能使四方平几

案由吾止繫盍免爾傾會當遇夷坦沈默更何營

此詩
王仲

澤所傳或以為仲澤作也因其與周
仲才詩意相近姑附于此以俟更考

酬郭安道 二首

西風吹起白蘋波半夜扁舟掠岸過不向長橋沽一醉
滿天明月奈秋何

江間小艇數能乘活計今如船子僧稍喜老妻能斫鱠

欲令穉子學扳罽

劉鐸

字文仲冀州棗強人承安五年進士元光二年入
為太常博士正大初改兵部員外郎以武昌軍節
度副使致仕癸巳歲病歿于京
師自號柳溪先生有集傳世

春日

翠微深處幾人家風颺輕烟雨壓沙寒勒野桃開較晚
向陽纔有兩三花

讀李訓鄭注傳

誰教閤宦作權臣肅代優游到敬文三子謀疎誰不道
泄機也合罪劉蕡

劉 勳

字少宣本出洛陽元魏遷洛陽二十萬家實雲中故其父祖而上為雲中人至少宣客居濟南樂其風土遂占籍焉少日住太學與兄譙庭老俱有聲場屋間南渡後專于詩學往往為人所傳云

春日

粉蝶耽香夢正迷黃蜂和蜜計何癡小軒無事誰如我
臥看楊花點硯池

秋涼

桃笙乘勢獻微涼
紈扇無功送暑光
老病不嫌風露冷

莫教添作鬢邊霜

秦略

字簡夫陵川人父事軻有詩名工作大字簡夫少
舉進士不中即以詩為業詩尚雕刻而不欲見斧
鑿痕故頗有自得之趣悼亡一詩高出時輩殆荆
公所謂看似尋常最奇崛成如容易却艱難者耶
年六十七卒臨終留詩云軀殼羈棲宅兒孫邂逅
思雲山最佳處隨意著詩魂簡夫自號西溪老人
有集行于世子
彥容為黃冠師

白髮

臨水時自照照我須與眉須眉何所似恰似純白絲從
此一白後寧有再黑時譬如花落地不復還故枝殷勤
語須眉聽我自解詩幼小癡讀書既壯多憂思自苦有
冰蘖自潤無膏脂勞生到今日汝白將何辭

悼亡

自古生離足感傷爭教死別便相忘荒陂何處墳三尺
老眼他鄉淚數行多事春風吹夢散無情寒月照更長

還家恰是新寒節忍見堂空紙挂牆

馬天來

字雲章人止謂之元章介休人黃裳榜經義進士
博學多技能畫入神品百年以來無出其右者大
安初調潁州司候靈壁簿召為國史院編
修官正大九年病歿于京師年六十一

山中

青林寂寂鳥關關畫出風烟落照間脫却草鞋臨水坐
野雲分我一邊閒

劉昂霄

字景玄別字李房陵川人元裕之云泰和中予識
景玄于太原人有言是在家讀廣記半月能背誦
者予未之許也戲取市人日歷鱗雜米鹽者令讀
之一過目無脫遺嘗用門資序調慶陽軍器庫使
不就諸公方薦試宏辭而景玄病不起矣臨終夢
賦山泉云帶雲縈遠澗和月到疎林又云萬里馮
唐老中年賈傳歸未
幾下世年三十七

趙村晚望

放眼東原上風烟接渺茫
林疎出村落野迴散牛羊
天
地浮元氣山河半夕陽
登高一長嘯未覺阮生狂

田紫芝

字德秀滄州人父濟以蔭為部掾德秀少孤養于外家定襄趙氏故多居于忻年十三外祖廣寧治中命賦麗華引語意驚絕人謂李長吉復生資性穎悟一覽萬言年二十讀經傳子史幾徧為人疎俊而以蘊藉見稱與同郡王元卿齊名貞祐初避兵臺山倉卒為游騎所馳遇害時年二十四士論之惜

夜雨寄元敏之昆弟

時年十六

醉臥蕭森蝶翅輕一燈無語夢邊明
虛檐急雨三江浪老木高風萬馬兵
枕簟先秋失殘暑湖山徹曉看新晴
對牀曾有詩來否為問韋家好弟兄

亂後登凌雲臺

秋思紛紛不易裁
凌雲臺上獨徘徊
亂鴉背著斜陽去
寒雁帶將秋色來
破屋無烟空碎瓦
新墳經雨已蒼苔
天翻地覆親曾見
信得昆明有劫灰

冥鴻亭下第後作

眼底功名一物無
飛揚跋扈竟何如
青雲歧路多辛苦
賴得皇家結網疎

王萬鍾

字元卿秀容人父甫字用之通經史淳質有儒行亦以知醫見稱兄萬石字器玉住太學有賦聲用之妻死不更娶二子俱無家室并曰之事率親為之貧居陋巷中破屋蕭然不蔽風雨而絃誦之聲不絕也元卿少有逸才與同郡田德秀齊名號王田初用之聞北兵入塞即以其州為不可守去之太原五年不敢歸貞祐二年州破死者十餘萬人而用之亦以是日病歿于太原較其時皆三月三日巳時也人謂用之先見固可稱然生死定數亦自不能免云元卿父歿之後與其兄居于平晉之金城里明年兵復至兄被害元卿欲收葬之時遊騎充斥親舊勸勿往元卿持不可曰兄死不收留此身欲何用耶流涕而去尋亦被禍時人甚哀惜之死時年二十七

元氏桂軒為敏之賦

簾捲堂前桂子涼一軒燈火夜初長月中春好元無價
天上風來別有香棠棣一家同映秀詞林百世繼餘芳
閒花野草空無數掩盡人間獨擅場

春宵

風尖月細春猶淺酒冷燈昏夜向深人在西軒愁不寐
十年間事總經心

雷瑄

字伯威坊州人以薦書從事史館調入作司使博
學能文時輩少有及者并州人李汾與伯威同在

史館以高蹇得罪伯威作詩送之頗譏翰林諸人不能少忍至與一書生相角逐使之狼狽而去有郎君未足留商隱官長從教罵廣文之句又云明日春風一杯酒與君同酌信陵墳人甚稱之

信陵館酒間

維昔有迂叟樹桐彼高岡殷勤為封植遂欲棲鳳皇桐
生日已長鳳來殊未央維鳳覽德輝非時詎來翔枝幹
枯以死志願終莫償憶在西周初飛下岐之陽裴回不
能去和鳴聲鏘鏘文王既已歿千載徽音亡咄爾叟何
為而欲發其光空令枯株上日晏啼鶯鶻

古意 二首

綿綿兔絲草濯濯檉樹枝結根偶相值引蔓纏綿之春
風一披拂花葉含榮滋弱質附美蔭百齡誓不違清商
忽用事霜飈颭已淒豈意百尺條同此寸草萎柔蔓失
所託憔悴徒傷悲知君無歲寒何用相因依

賢王悲墜履賢婦念遺簪重在不亡故微物何所欽嗟
我昔遊友雲路揚徽音詎念宿昔好棄擲各飛沈昔如
膠投漆今如辰與參桃李雖成蹊諒無松柏心

龍德宮

紫簫吹斷絲雲歸十二樓空盡玉梯綵仗竟無金母降
仙裾猶憶化人攜千年洛苑銅駝怨萬里坤維杜宇啼
莫倚危欄供極目斜陽更在露盤西

王賓

字德卿亳社人貞祐二年進士由虹縣令入為尚
書省令史壬辰遇亂反正授同知集慶軍節度使
明年以蔡州迎駕詔行六
部尚書事為叛兵所害

除夜

落拓功名挽不前
圍爐兀坐夜蕭然
臘殘畫角東風裏
春到梅花小雪邊
守得歲來慵攬鏡
送將窮去自裝船
平明檢點人間事
只有詩魔似去年

李夷

字子遷後改名儀宛
立人苦于作詩賦
古鏡云盤
盤古皇州夢斷
繁華歇一鞭
春事忙耕出隴頭月
土蝕背花昏蹄
泠駭龍蹲須髯
怒欲張縮手不敢
捫又云壽光閱
人多曾有此客
否欽叔諸人甚愛
之

書淵明傳後

南渡龍孫角禿顛不甘橫斃寄奴弦一襟義氣麾周粟
滿簡清風削宋年雪徑低低迴松落落霜籬健羨菊鮮鮮
時屯謚輩輕顏節顏厚吾家草木賢

史學

字學優延安人兄才字才長住太學有聲學優正大
中省試第一人釋褐舞陽簿辟盧氏令卒官妻
李氏河南尹成之孫女小詩殊有思致學優嘗客
京師有所眷久而不歸李作詩寄之云百年風樹
底誰淚到君前學
優得詩即日命駕

陪陳彥人謁筠泉榮上人

以下四絕句皆其兄
史才詩因學優附見

強隨禪客到西禪竹柏圍青蔭石泉一首小詩吟不就
閒情元在落花邊

宮詞

寶帶香構水府仙黃旂彩扇九龍船熏風十里瑤華島
一派歌聲唱采蓮

晚梅

孤根春半恰春回剛逐夭桃艷杏開蝶子蜂兒應有語
東風元不為渠來

七夕

箱牛回馭錦機閒天上悲歡亦夢間月夜並肩人不見
蕭蕭風葉滿驪山

侯冊

字君澤以門資仕與杜仲梁張仲經劉京叔遊用
是得名嘗作樂府云玉階春草傷心碧錦瑟華年
過眼空又云千金買斷青樓月爛醉桃花扇影風
人多愛之壬辰歲病京師園中作詞甚哀明日君
澤死其後京
城亦丘墟矣

醉中

爛醉歸來失驢腳破靴指天冠倒卓起來白眼望青山
狂氣崢嶸無處著陶潛止酒意有在舖糟醖醺良未害
君看謝奕對桓溫得失老兵何足怪螟蛉蜾蠃待二豪
飲中寧有山家濤平明徑訪陳驕坐相對西風把蟹螯
寒食

交遊零落葉辭柯歲月崢嶸馬注坡燕子不來寒食過
滿城風雨落紅多

昨朝

昨朝已作春歸辭今日還成送客詩客子春光俱不見
落花寂寂閉門時

王元粹

字子正初名元粹後止名粹平州人系出遼世衣冠家年十八九作詩便有趣性習專固世事不以累其業故時輩無能當之者正大末用門資叙為南陽酒官遭亂流寓襄陽襄陽破隻身北歸寄食燕中遂為黃冠師有十月風霜侵病骨數家針線補殘衣之句親舊有憐其孤苦欲為之更娶者子正業已高舉主太極道院竟不能自返年四十餘癸卯九月病卒詩人淄川楊叔能輓之云匹婦主中饋雖貧生理存五言造平淡隻影臥黃昏謾下陳蕃榻虛沾文舉尊北平家世絕銜恨入荒原

從弟鬱亦攻詩方
之其兄蓋商周矣

春日

春日何慘慘春雲荷陰陰桃李都未花況乃餘寒侵久
在 cities 居而無人見尋讀易了一編靜見天地心貧士
寡徒侶古來非獨今

西山避亂

蒼山多回互四望令人迷過午日已暖殘雪融為泥路
滑不可進弱葛愁攀躋老幼委溝壑不如犬與鷄嗷嗷

同行子手中各有攜汲澗為飲食架木為巖栖夜半三四驚翁媪禁兒啼念我長病母亂離隔東西

壽李長源

匹馬短衣看此行看君誰信是書生聽詩未覺秦川遠倚劍長懷晉水清一飯見哀韓信恥千金為壽魯連輕壯年休灑新亭淚且為江山灌巨觥

王鬱

字飛鸞伯少日作樂府擬古別離有黃鶴樓高雲不飛鸞鸛州寒星已曙之句人多傳之其後入京師

大為李欽叔所稱
用是頗自貴重云

傷別曲

蘭皋飛暗塵征車紆去轍
長安雖咫尺回首繁華歇
故人亭下酒蛾睂眼中血
平生慷慨腸忽作柔絲結
傳聞紫塞傍秋烽下危堞
班超未投筆來填空嚼鐵
誰能金閨中坐看娟娟月

古別離

山腰露蕙含天淚
江林楓葉秋容醉
夫君八月雁門行

碎霜冷印白龍轡憶君挑妾初鳴琴琴中已有白頭吟
朝朝暮暮當時事言之祇足傷人心君不見湘妃二女
哭舜時烟筠青玉紅珠滋蒼梧人去百想絕忍教今日
生離別生離別情偏重不及雙飛南浦雲落紅寂寂春
閨夢

折楊柳

長安二月多綠楊遠信未到龍庭旁佳人中夜抱影坐
風窗冷冷愁思長青天無雲一鏡潔萬戶千門音響絕

何人橫笛在高樓
玉龍叫徹春江月

王革

字德新一名著臨潢人潢一作潼用蔭補官正大中以六赴廷試賜出身調宜君簿為人有蘊藉善談笑密國公壽與之唱酬相得甚歡年七十八終于雲中

寄答劉京叔

十年相望惜睽違
驚見蘭章墮客扉
鄭子已聞耕有谷
榮公誰念老無衣
水浮落日流難盡
山礙行雲斷不飛
千古神州亦吾土
幾時同采北山薇

申萬全

字百勝高平人少有聲太學貞祐二年乙科調福昌簿不赴隱居盧氏山中以讀書為業正大中召為史館編修從征死于水

病中

浪走天涯歲月侵病中猶作越人吟
野麋本自便豐草倦鳥寧堪憶故林
畫像功名原有命乞墦富貴果何心
幾時真脫塵囂累巖岫尋居不厭深

杜佺

字真卿武功人宋末有詩名于闕中阜昌中登科
涖官亦有聲馬鬼太真墓過客題詩甚多道陵詔
錄其詩得五百餘首付詞
臣第之真卿詩在高等

馬鬼道中

垂柳陰陰水拍堤春晴茅屋燕爭泥海棠正好東風惡
狼藉殘紅送馬蹄

李之翰

字周卿濟南人宣和末擢第人有勸謁童貫可以
徑至館職者周卿謝絕之金兵破洛州縛見元帥
誘之使降語及君臣之際辭情慷慨自
分一死帥憐之遂被錄用後守寧州

書呈仲孚

造物固難量誰能計寒餓失馬乃為福夢牛翻作禍長
溪霜練靜脩嶺蒼龍臥魂夢吾已安不勞歌楚些

歲暮

休怪年來白髮新天涯三載困埃塵偶離沙磧窮陰地
收得桑榆老病身對雪莫吟秦嶺句撥醅且醉漢江春
此生自斷無餘事何必區區問大鈞

三興居士

三興居士
阜昌中人

題平陰僧寺

三吳家近水晶宮，行坐紅香綠影中。今日異鄉僧寺裏，

一盆荷葉戰西風。

原註云：三興寓宋興之意。三字可增作宋亦可作中也。又楚以三戶而興。

其義廣矣。蓋宋人流落中州者。

楊興宗

興宗高陵人。宋既渡江，故興宗有龍南集。楊君羨嘗見之。按興宗者亦寓意與三興同。

出劍門

嘔啞鳴櫓下長川萬疊青峰只眼前山鷗啄殘紅杏粉
杜鵑啼破綠楊烟夢迴蜀棧雲千片醉枕巴江月一船
物色誰分杜陵老風騷牢落劍南天

元日能

日能不知何許人
與劉巖老同時

紅梅

天上瓊兒白玉肌吳妝約畧更相宜認桃辨杏由君眼
自有溪風山月知

蛩老同賦云一點清香透雲雪是中
那得杏花天評者謂二詩同意而日

能為工吳
妝一作紅妝

范 攄

字元涉系出潁川
有詩話行于世

和高子初梅

春風也自惜流光只放寒梅一樹芳
玉粉更妝前夜雪
口脂猶注昔年香
江湖昨夢誰同寄
詩酒風流豈易忘
東閣何郎未全老
花枝休笑鬢絲長

宋 楫

字濟川長干人年十九天德三年擢第除著作郎母老丐歸養許之官至孟州防禦使

庭槐

庭槐先人手所植再世清陰方滿臺慚愧兒孫種桃李
花枝準擬當年開

高德裔

字曼卿鶴野人高才博學弱冠擢第累遷登聞檢院同知太府少監平陽少尹開州刺史豐王傳卒
于西京路
轉運使

坐亡女

女環川張氏年十三異夢之後
坐亡已四年矣贈詩者甚多

結習銷來性自圓去留元不問人天消搖自是忘形蝶
枯寂寧同委蛻蟬無礙真空常蕩蕩若存餘息尚綿綿
立亡坐脫皆遊戲定力何嘗有變遷

郭長倩

字曼卿文登人皇統丙寅經義乙科仕
至祕書少監兼禮部郎中修起居注

義師院叢竹

南軒移種自西壇瘦玉亭亭十數竿得法未應輸老柏
植根兼得近幽蘭雖無穠艷包春色自許貞心老歲寒

百草千花盡零落請君來向此中看

張翰

字林卿秀容人大定二十八年進士為人有蘊藉如素宦然累遷監察御史翰林直學士貞祐初戶部侍郎車駕南渡出為河平軍節度使召拜戶部尚書卒年五十五

萬寧宮朝回

宿雨初收變曉涼宮槐恰得幾花黃鵲傳喜語留鞘尾
泉打空山輓鞠場已覺雲林非俗境更從衣袖得天香
太平朝野歡娛在不到蓮塘有底忙

金郊驛

山館蕭然爾許清
二更枕簟覺秋生
西窗大好吟詩處
聽得松聲又雨聲

李好復

字仲通安喜人明昌二年進士榆次令有能聲入
為警巡使嘗以事縛一護衛道陵有投鼠之喻出
為歷城令終
于滑州刺史

雨中與客飲

門外平橋一水分
數聲漁唱隔溪聞
暖風落絮飄香雪

小雨沾花濕夢雲釀其未甘名長物詩壇聊欲張吾軍
相逢莫惜通宵飲明日間身不屬君

楊邦基

字德茂大定中進士仕至祕書監禮部尚書文
筆字畫有前輩風調世獨以其畫比李伯時云

墨梅

粉蝶如知合斷魂啼妝先自怨黃昏花光筆底春風老
寂寞嶺南烟雨痕

盧元

字子達玉田人幼而敏惠年未二十試于長安為策論魁擢第後又中策魁明昌初章廟設宏詞科命公卿舉所知子達與郭黻周詢張復亨就試凡七日並中選遂入翰苑累遷至待制

閒詠

天近蒼龍闕居連洗馬堂松聲得鄰舍山色出宮牆
巷陋輪蹄少庭閒日月長九衢紅霧裏亦有白雲鄉

舒穆魯世勣

字晉卿承安中進士終于禮部尚書

紙鳶

鵝鵠鵠孰雌雄假手成形本自同果物戲人人戲物
為風乘我我乘風扶搖漫擬層霄上高下都歸半紙中
兒輩呶呶方佇目豈知天外有冥鴻

趙思文

字廷玉永平人明昌五年進士貞祐中陷歿都城
間關南渡遂為金主所知歷執州刺史汝州防禦
使金安集慶兩軍節度使
召拜禮部尚書壬辰卒

試院中呈同官崔伯善李順之

睡起松陰鳥雀譁忽驚霜果墮檐牙簡書迫促全疎酒

眼力眇昏只費茶不學道人餐柏葉却隨舉子踏槐花
提衡文字非吾事崔李風流有故家

劉 昂

字次霄濟南人承安五年進士調鄆縣令劉光甫曾為同官稱次霄高材博學詩時有佳句云

讀三國志

虎視鯨吞卒未休一時人物盡風流婦翁正得黃承彥
兒子當如孫仲謀乳臭蒙孫真寄坐齒寒鄰國莫分憂
阿瞞孤媚無多罪誰作桓文得到頭

王仲元

字清卿平陰人承安
中進士以能書名

雪中同周臣內翰賦

天上瑞花散不收
溫溫叶氣浹皇州
橫溪月澹梅宜臘
平野風閒麥有秋
清興雅高東武會
孤吟誰似灞陵遊
西山玉立三千丈
好句都輸趙倚樓

盧洵

字仁甫高平人李承旨致美見所作上梁文勉使
就舉六十一歲呂造榜登科歷河南府教授河陽

丞宜陽令致仕後居
伊陽年八十三卒

白溝

白沙清淺不容舟
遼宋封疆限此溝
到了山河無定主
碧波依舊只東流

馮辰

字駕之臨潼人
貞祐三年進士
辟涇陽令九歲知作詩

雨後

時年十三

東風花外錦鳩啼
喚起西山雨一犁
綠滿疏畦人不

枯槁閒立夕陽低

李過庭

字庭訓武亭人貞祐二年進士歷宜陽永寧滎陽
三縣令所去見思入為右曹掾斷獄寬平當妖賊
李亨首坐所誅誤數百人皆從輕法正大
中擢右三部司正終于昌武軍節度副使

讀公孫弘傳

古來好客數平津我道真龍未必真一箇仲舒容不得
不知開閣為何人

宋元詩會卷六十四